

Aktivnost poslovnog udruženja

Redovna sjednica upravnog odbora Poslovnog udruženja privrednih organizacija slatkovodnog ribarstva »Kornatexport-import«, Zagreb, koja je održana koncem mjeseca maja ove godine u Zagrebu, riješila je niz pitanja od zajedničkog interesa za ovu granu privrede.

Na dnevnom redu sjednice bila je:

- Revizija plana izvoza za 1963. godinu,
- Organizacija i plan financiranja poslovnice u Beogradu,
- Korištenje zajedničkih sredstava, dobivenih iz tehničke i drugih vidova pomoći,
- Formiranje sredstava za naučni rad i
- Eventualije.

Plan izvoza za 1963. godinu na 1962. povećan je za 15%, dok su u isto vrijeme planirani troškovi materijalno financijskog poslovanja smanjeni za 15%. Za izvršenje ovako povećanog plana, uz istodobno smanjenje troškova poslovanja biti će potrebno, da radni kolektiv Biroa poslovnog udruženja daje maksimum od sebe, da se ovakav plan i ostvari.

Upravni odbor odobrio je i stimulativne kriterije, koji će davati potstrek da kolektiv Biroa sa što manje materijalno financijskih sredstava ostvari što je moguće veći plan izvoza.

Na sjednici su pozvani predstavnici privrednih organizacija da osiguraju potrebne količine kvalitetne robe, predviđene za izvoz. Članice poslovnog udruženja jednoglasno su preuzele obavezu da će u određeno vrijeme staviti na raspolaganje robe u potrebnoj količini Birou, tako, da nebi doveli u pitanje izvršenje plana izvoza. Prema postignutim rezultatima izvoza u prvih 6 mjeseci ove godine i izvršenim pripremama za drugo polugodište, smatraju u »Kornatexportu« Zagreb, da će ovaj, iako vrlo nategnut plan biti u potpunosti ostvaren.

Po pitanju korištenja zajedničkih sredstava konstantirano je, da postoje izvjesna sredstva veće vrijednosti, koja su dobivena iz tehničke pomoći, te da je nužno da se korištenje ovih regulira posebnim pravilnicima, kako bi se najracionalnije i najsvrsishodnije mogla koristiti. Za svrsishodnu upotrebu zajedničkih osnovnih sredstava donesena je načelna odluka o načinu korištenja zajedničke opreme i poseban pravilnik o načinu korištenja svakog pojedinog osnovnog sredstva. Pravo korištenja opreme imaju sve privredne organizacije, članice udruženja, pod istim uslovima. Pravilnik predviđa i nacrt

ugovora o izvršenju usluga, način vođenja evidencije o radu, te utrošku goriva i maziva.

Raspravljajući o unapređenju slatkovodnog ribarstva, povećanju proizvodnje na postojećim ribnjacima, a imajući u vidu otvorenje novih ribnjačarskih površina, prisutni su konstatali, da je potrebno smjelije pristupiti stručnom osposobljavanju kadrova. S tim u vezi potrebno je pristupiti formiranju kurseva za osposobljavanje kvalifikiranih ribarskih radnika i podržati postojeći post-diplomski studij za osposobljavanje ribarskih stručnjaka, a naučnu službu postaviti na njeno pravo mjesto. Naime, kod povećane proizvodnje ribe, koja iz godine u godinu sve više raste, naučna služba treba da se ozbiljno pozabavi otklanjanjem uzroka oboljenja i pronalaženja novih puteva za povećanu proizvodnju.

Za konstantan naučni rad svakako su potrebna financijska sredstva. Ta sredstva dužni su u prvom redu da osiguraju proizvođači. Zbog toga nije slučajno, što se tako ozbiljno raspravljalo o formiranju sredstava za naučni rad, jer su ona neophodna baš u sadašnjoj fazi razvoja slatkovodnog ribarstva.

Govoreći o post-diplomskom studiju ribarstva na veterinarskom fakultetu u Zagrebu, poboljšanju nastavnih planova i programa, zauzet je stav da ne samo da studij treba da nastavi radom, već mu je potrebno dati opće jugoslovenski karakter. Zapravo, bilo je govora da se radi o osnivanju studija trećeg stepena u Sarajevu, što Poslovno udruženje smatra neispravnim. Upravni odbor Poslovnog udruženja smatra, da bi bilo ne samo neopravdano, već i štetno da dođe do cijepanja studija na sarajevsku i zagrebačku grupu, jer bi u takvoj situaciji izgubili i ovo što smo postigli, a to je, da ne bi imali odgovarajućeg nastavnog kadra, niti potrebnih financijskih sredstava za rad, a postoji opravdana bojazan da ne bi bilo ni dovoljno kandidata. Dakle, Udruženje mora voditi stalnu brigu o uzdizanju kvalitetnih stručnjaka, jer moramo stvoriti sposobne stručnjake, ako želimo stvoriti veću proizvodnju.

Sredstva za naučni rad stvarala bi se kod Poslovnog Udruženja na taj način, što će privredne organizacije, članice udruženja, uplaćivati udruženju $\frac{1}{2}\%$ po kg prodane ribe. Ovaj zaključak primjenjivao bi se od 1. IX 1963. godine.

Peo Pogrmilović